

Morning Dogri (NSD) National News Bulletin 23-07-2024

आकाशवाणी

- खजाना मंत्री निर्मला सीतारमण होर अज्ज लोकसभा च 2024–25 ब'रे लेई केन्द्री बजट पेश करगंन।
- सरकार दा आखना ऐ जे पिछले किश ब'रे दरान बेरोजगारी दी दर च कमी दिक्खने गी लब्धी ऐ।
- नीट-यूजी मतेयान मामले च सुप्रीम कोर्ट नै आईआईटी दिल्ली गी फीजिक्स दे पेपर गी लेइयै बने दे विवाद पर माहिरें दा इक पैनल बनाने लेई आखेआ ऐ।
- चीन च भारी बरखा कारण चानचक्क आए दे हाड़ें च मरोने आलें दी गिनतरी 14 होई गेई ऐ।
- महिला एशिया कप टी-20 च अज्ज भारत दा मकाबला नेपाल कन्नै होग, कल मेजबान श्रीलंका नै मलेशिया गी 144 रंज कन्नै हराया।

<><><><><><>

Union Budget

खजाना मंत्री निर्मला सीतारमण होर अज्ज बडलै 11 बजे लोकसभा च केन्द्री बजट 2024–25 गी पेश करगंन। नरेन्द्र मोदी सरकार दे त्रीए कार्यकाल दा एह पैह्ला बजट ऐ। बजट पेश कीते जाने थमां पैहले संसद दी दौनें सभाएं च आर्थिक सर्वेक्षण 2023–24 पेश कीता गेआ हा। एहदे च अर्थबवस्था दे प्रदर्शन बारे दस्सेआ दसाया गेआ। 2019 च खजाना मंत्री दे तौर पर औहदा संभालने मगरा निर्मला सीतारमण हुंदा एह लगातार 7मां बजट ऐ। बजट थमां पैहले आले सलाह-मशवरे च खजाना मंत्री होरें केई माहिरें, सलाहकारें, राई-बाई सरबंधी संगठनें, कारोबारी इदारे, राई-बाई अर्थ-शास्त्रिएं, शिक्षा, सेहत, बपार, रोजगार ते शैहरी क्षेत्रें दे माहिरें सनें केई मुत्तलका धड़ें कन्नै बैठकां कीतियां। बैठक दरान खजानामंत्री होरें मुत्तलका धड़ें गी भरोसा जताया जे उंदी सलाह ते सुझाएं पर ध्यान दित्ता जाग। लोकसभा च बजट पर कीते जाने मगरा एह राज्यसभा च पेश कीता जाग।

<><><><><><>

Economic Survey

आर्थिक सर्वेक्षण 2023–24 च माली ब'रे 2024–25 च सकल घरेलू उत्पाद यानि जीडीपी दी विकास दर 6.5 थमां 7 फीसदी तोड़ी दस्सी गई ऐ। खजाना मंत्री निर्मला सीतारमण हुंदे आस्सेआ पेश कीते गेदे आर्थिक सर्वेक्षण मूजब कुल संसारी आर्थिक तरक्की च जक्को-तक्की दे बावजूद मकामी क्षेत्रें 2023–24 च आर्थिक प्रगति गी समर्थन दित्ता ऐ। सेवा क्षेत्र नै भारत दी प्रगति च बड़ा मता योगदान दित्ता ऐ। सेवा क्षेत्र नै कुल अर्थबवस्था च 55 फीसदी दा योगदान दित्ता ऐ। मैंहगाई बारे भारतीय रिजर्व बैंक नै आखेआ ऐ जे माली ब'रे 2025 च मैंहगाई दर 4.5 ते 2026 ब'रे 4.1 फीसदी रौहने दी मेद ऐ। इन्नै आखेआ जे भारत दा माली खसारा जेहड़ा 2023 च जीडीपी दा 6.4 फीसद हा 2024 च घटियै 5.6 फीसद रेई गेआ ऐ। इन्ने आखेआ जे 2026 तोड़ी भारत दा माली खसारा घटियै 4.5 फीसदी तोड़ी होई जाने दी मेद ऐ।

<><><><><><>

Unemployment

सरकार नै आखेआ ऐ जे मुख्य च बेरोजगारी दर च हाल दे ब'रें च गिरावट आला रुक्ख दिक्खेआ जा'रदा ऐ। लोकसभा च इक लिखित सुआले दे परते च श्रम ते रोजगार राज्य मंत्री शोभा करंदलाजे होरें आखेआ जे सरबंधी हालिया रिपोर्ट मूजब 2020–21 च 15 ब'रे ते ओह्दे थमां मती उमरी आले लोकें आस्तै अनुमानित बेरोजगारी दर 4.2 फीसद ही जिसलै जे एह 2022–23 च 3.2 फीसद रेई।

<><><><><><>

NEET-Physics

सुप्रीम कोर्ट नै आईआईटी दिल्ली गी इस ब'रे दे नीट दाखला मतेयान च फीजिक्स दे सुआल दे दऊं आप्शाने गी सेही जवाब मनने दे राष्ट्रीय परीक्षा अजेंसी एनटीए दे फैसले पर अपनी राय देने लेई इक बक्खरा पैनल बनाने लेई आखेआ ऐ। प्रधान न्यायधीश डी.वाई. चन्द्रचूड़ हुंदी अध्यक्षता आली पीठै माहिर टीम गी अज्ज दपैहरी 12 बजे तोड़ी सुप्रीम कोर्ट दे रजिस्ट्रार गी अपनी रिपोर्ट देने लेई आखेआ ऐ।

नीट—यूजी मतेयान आयोजित कराने च बेजाबतिएं दा दाष लाने आली याचिकाएं दे बैच च फिजिक्स दे इक सुआल दे जवाब च दऊं आप्शन होने कारण ग्रेस नंबर देने पर सुआल पुट्टेआ हा जेह्दे च आखेआ गेदा हा जे 44 मेदवारें गी सुआल स्पष्ट नेई होने कारण पूरे नंबर दित्ते गे न।

<><><><><><>

NEET

सरकार नै आखेआ ऐ जे पिछले 7 बरे च मुख्य च पेपर लीक दा कोई मामला सामने नेई आया ऐ। ओह नीट—यूजी पेपर लीक मामले च किश बी नेई छपेला रदी ऐ। शिक्षा मंत्री धर्मेंद्र प्रधान होरें लोकसभा च प्रश्नकाल दौरान जिमनी सोआलै दा परता दिंदे होई आखेआ जे मुख्य च पेपर लीक दियां घटना आम होने दे विपक्षी दलें दे आरोपें गी खारज करदे होई उनें आखेआ जे मुख्य भरै च शड़ा इक मामला सामने आया ऐ। उनें आखेआ जे सीबीआई मामले दी जांच करा'रदी ऐ। एह्दे थमां पैहले कांग्रेस नेता राहुल गांधी होरें इस मामले गी पुट्टदे होई आरोप लाया हा जे मुख्य दी परीक्षा प्रणाली च बड़ी मती गंभीर समस्या ऐ।

<><><><><><>

China Floods

चीन च सिहुआन सूबे दे दक्खन पच्छमी इलाके च भारी बरखा कारण आए दे हाड़ें करी मरने आलें दी गिनतरी 14 तोड़ी पुज्जी गई ऐ। कल संजा मकामी प्रशासन नै इक ब्यानै च आखेआ जे अजें तोड़ी 14 लोथां बरामद कीती जाई चुकी दियां न, जदके 25 जने अजें बी लापता न। बचाह दल लापता लोकें गी तुप्पने च लग्गे दे न जेह्दे लेई ओह ड्रोन, खोजी कुत्ते ते लाईफ डिटेक्टर यंत्रें दी मदाद लै'रदे न। दऊं दिनें पैहले होई दी जबरदस्त बरखा कारा सूबे दी मकामी नदी च हाड़ आई गेआ, जेह्दे कारण शीहुआ ग्रां च 40 मकानें गी बड़ा मता नुक्सान पुज्जा ऐ।

<><><><><><>

IMD

मौसम विभाग नै गुजरात, कांकण, गोवा ते मध्य महाराष्ट्र च अगले दऊं दिनें तोड़ी भारी बरखा होने दी पेशगोई कीती ऐ। उ॒त्तर, उत्तर-पूर्व, मध्य ते पच्छमी भारत दे केई हिस्सें च कल्लै तोड़ी भारी बरखा दी मेद जाहर कीती ऐ। मसैसम विभाग नै आखेआ जे पंजाब, चंडीगढ़, हरियाणा ते दिल्ली च बाढ़े तापमान होने कारण उमस आली स्थिति बनी दी रौहग।

<><><><><><>

Broadcasting Day

अज्ज राश्ट्रीय प्रसारण दिवस ऐ। भारत दी प्रसारण यात्रा, जून 1923 च बाम्बे दे रेडियो क्लब दे पैहले प्रसारण कन्नै शुरू होई ते 23 जुलाई 1927 गी इंडियन ब्राडकास्टिंग कंपनी दी स्थापना होई जेह्दे नै मुल्खै च संगठित रेडिया प्रसारण दी शुरूआत होई। इस ध्याड़े गी राश्ट्रीय प्रसारण दिवस दे रूप च मनाया जंदा ऐ।

<><><><><><>

Bindra Olympic

अंतर्राष्ट्रीय ओलंपिक समिति दे कार्जकारी बोर्ड नै अभिनव बिंद्रा गी ओलंपिक अण्णियान च उत्कृष्ट सेवा देने लेई ओलंपिक आर्डर कन्नै सम्मानत करने दा फैसला लैता ऐ। एह अंतर्राष्ट्रीय ओलंपिक समिति दा सब्बने शा बड्डा पुरस्कार ऐ। 41एं ब'रे दे अभिनव बिंद्रा, 2008 दे बीजिंग ओलंपिक खेड्डें च मर्दे दे 10 मीटर प्यर राइफल मकाबले च जित्त हासल करियै व्यक्तिगत ओलंपिक च सुन्ने दा तगमा जित्तने आले पैहले भारतीय बने हे।

<><><><><><>

Mansukh Mandviya

युवा मामलें ते खेड्डें सरबंधी मंत्री डॉ. मनसुख मांडविया होरें ओलंपिक अभियान लेई योगदान लेई “ओलंपिक आर्डर” कन्नै सम्मानत कीते जाने पर नशानेबाज अभिनव बिंद्रा होरें गी ममारकबाद दित्ती ऐ।

इक सोशल मीडिया पोस्ट च डॉ. मांडविया होरें आखेआ जे अभिनव बिंद्रा हुंदे योगदान ते इस उपलब्धि नै सारे भारतीयें गी गर्व मसूस कराया ऐ की जे उनेंगी ओ सम्मान थोआ जेह्दे ओह हक्कदार हे। उनें आखेआ जे बिंद्रा हुंदा नां औने आले नशानेबाजें ते ओलंपिक खेड्डें च हिस्सा लैने आले सब्बने खडारिएं गी महेशां लेई प्रेरत करदा रौहग।

<><><><><><>

Bangladesh

बंगलादेश दिएं प्रधानमंत्री शेख हसीना होरें सरकारी नौकरिएं च आरक्षण दे खलाफ हाल च विद्यार्थिएं दी अगुवाई च होए दे विरोध प्रदर्शन दरान होई दी हिंसक घटनाएं लेई अपने सियासी विरोधिएं गी दोषी करार दित्ता ऐ। राजधानी ढाका च उद्योग जगत दे बड्डे प्रतिनिधिएं गी संबोधत करदे होई शेख हसीना होरें आखेआ जे हालात च सुधार होने पर कफर्यू हटाई लैता जाग। उनें आखेआ जे नागरिकें दे जानमाल दी हिफाजत लेई उनेंगी मजबूरी च कफर्यू लाना पेआ ऐ। इनें प्रदर्शनें च 147 लोकें दे मारे जाने दी तस्दीक होई चुकी दी ऐ।

<><><><><><>

Asia Cup

महिलाएं दे एशिया कप टी-20 दे इक मैच च कल मेजबान श्रीलंका नै मलेशिया गी 144 रंज कन्नै हराया। कल दम्बुला च गुप-बी दे इक मैच च टॉस जित्तिथै पैहले बल्लेबाजी करदे होई श्रीलंका नै 20एं ओवरें च 4 विकटें दे नुकसान पर 184 रंज बना। जित्त लेई लोडचदे 185 रंज दे लक्ष्य दा पिच्छा करदे होई मलेशिया दी पूरी टीम 1 गेंद बाकी रौह्दे शडे 40 रंज गै बनाई सकी। गुप-ए च अज्ज भारत दा मकाबला नेपाल कन्नै होग। एह मैच संजा'लै 7 बजे शुरू होग।

<><><><><><>